



NEWSLETTER

OLIMPIJSKOG KOMITETA BIH

No. 35, mart/april 2026



Poštovane sportašice i sportaši,
Poštovani prijatelji,

Zadovoljstvo mi je u ime Olimpijskog odbora Bosne i Hercegovine predstaviti novi dvomjesečni newsletter u kojem objedinjujemo najvažnije aktivnosti, postignuća i smjerove djelovanja naše organizacije i sportskih saveza. Protekli je period bio izuzetno dinamičan i donio je niz važnih pomaka za razvoj sporta u Bosni i Hercegovini.

Održana 3. redovna sjednica Generalne skupštine OK BiH potvrdila je našu predanost transparentnom upravljanju i daljnjem jačanju institucionalnih kapaciteta. Radni sastanci i posjete predstavnika vlasti, sportskih saveza i partnera dodatno unapređuju zajedničku suradnju u cilju jačanja sportskog sustava.

Čestitam svim našim reprezentativcima i reprezentativkama na ostvarenim rezultatima u proteklom razdoblju koji nas ispunjavaju ponosom.

Regionalna i međunarodna suradnja i dalje ostaje prioritet: razmjene iskustava, diplomatski susreti i suradnja predstavljaju trajni doprinos koji grade ugled naše zemlje u olimpijskom pokretu. U tom duhu najavljujemo i simpozij „Sport u eri umjetne inteligencije – sport, etika i izvrsnost“, koji će se održati 22. svibnja 2026. godine.

Nastavit ćemo ulagati u edukaciju sportaša, trenera i stručnjaka te poticati projekte koji integriraju etiku i izvrsnost u sportski sustav.

Zahvaljujem svim sportskim savezima, trenerima, sportašima, sponzorima i institucijama na suradnji i potpori. Pozivam zajednicu da i dalje zajedno gradimo sustav koji prepoznaje i nagrađuje trud, talent i rezultate.

S poštovanjem,

Davor Komšić
Predsjednik Olimpijskog odbora Bosne i Hercegovine

ODRŽANA 3. GENERALNA SKUPŠTINA OK BIH



U Multimedijalnoj sali Olimpijskog komiteta Bosne i Hercegovine, 24. marta održana je 3. redovna sjednica Generalne skupštine OK BiH. Skupštinom je predsjedavao predsjednik OK BiH Davor Komšić.

Na dnevnom redu su bili:

- Razmatranje i usvajanje Zapisnika sa 2. redovne sjednice održane 10.04.2025.
- Izvještaj Nadzornog odbora za 2025.
- Izvještaj o radu OK BiH za 2025.
- Finansijski izvještaj i završni račun za 2025.
- Revizorski izvještaj
- Prijedlog Plana rada OK BiH za 2026.
- Prijedlog Finansijskog plana za 2026.

Usvojen je i prijedlog potpisivanja Memoranduma o razumijevanju s Ambasadom Alžira u saradnji s NOK-om Alžira.

Svi predočeni izvještaji i planovi su razmatrani i jednoglasno usvojeni uz izraženu podršku i pohvale za rad OK BiH prisutnih delegata.



PREDSJEDATELJ ZASTUPNIČKOG DOMA PS BiH MARINKO ČAVARA U RADNOJ POSJETI OLIMPIJSKOM ODBORU BiH

Predsjednik Olimpijskog odbora BiH Davor Komšić i generalni tajnik OO BiH dr. sci. Said Fazlagić primili su danas u radnu posjetu predsjedatelja Zastupničkog doma PS BiH Marinka Čavaru, te predstojnicu ureda g-đicu Mariju Ćosić.

Razgovaralo se o dodatnom ustroju i jačanju sportskog sustava BiH kroz zakonske i druge okvire kao i pomoći u pronalaženju adekvatnog modela za financiranje vrhunskog sporta i sportaša, sportskih saveza BiH i Olimpijskog odbora BiH.



MINISTRICA BOŠNJAK S PREDSJEDNIKOM OLIMPIJSKOG ODBORA BiH: FOKUS NA JAČANJU POTPORE SPORTU



Ministrica civilnih poslova Bosne i Hercegovine Dubravka Bošnjak ugostila je predsjednika Olimpijskog odbora BiH Davora Komšića. Fokus razgovora je bio unaprjeđenje razvoja sporta i jačanje suradnje u zemlji.

Razgovor je obuhvatio prioritete u sportu, među kojima su potpora vrhunskim sportašima, poboljšanje uvjeta za međunarodna natjecanja i promicanje olimpijskih vrijednosti među mladima. Bošnjak je naglasila da Ministarstvo ostaje predano stalnoj potpori Olimpijskom odboru BiH te istaknula potrebu koordiniranog djelovanja svih

razina vlasti za sustavni razvoj sporta i jačanje institucionalne potpore olimpijskom pokretu.

Komšić je zahvalio na dosadašnjoj suradnji i potpori te izrazio spremnost nastaviti aktivnosti usmjerene na promicanje sporta, posebice među mladima, i daljnje jačanje olimpijskog pokreta u Bosni i Hercegovini. Sugovornici su također istaknuli važnost trajnog dijaloga i koordinacije nadležnih institucija i sportskih organizacija kako bi se osigurali kvalitetniji uvjeti za razvoj sporta.

SREDNJOBOSANSKI KANTON USVOJIO PRAVILNIK O KATEGORIZACIJI SPORTAŠA



Na inicijativu OK BiH i održanih sastanaka u pojedinim kantonima i odjelima za sport, na adresu OK BiH je 24. ožujka 2026. godine stigao dopis u kome nas Srednjobosanski kanton obavještava da su usvojili Pravilnik o kategorizaciji sportaša i priznavanju zvanja vrhunski sportaš.

Pravilnik je usvojen od strane Ministarstva obrazovanja, nauke, mladih, kulture i sporta ovog kantona uz nesebičnu podršku resornog ministra Bojana Domića.

Donošenje ovog akta predstavlja značajan napredak u jačanju i ustroju sportskog sistema BiH te se nadamo da će i ostali kantoni, ukoliko to već nisu, slijediti primjer donošenja pravilnika i drugih zakonskih akata u gore navedenu svrhu. OK BiH je na 3. Generalnoj skupštini zamolio prisutne delegate iz sportskih strukovnih saveza/članica da iskoriste svoj autoritet i društvenu sportsku poziciju te potaknu donosiocima odluka i nadležna ministarstva u svojim zajednicama da i oni slijede ovu „dobru praksu“ u svojim prebivalištima i kantonima. OK BiH stoji na raspolaganju za bilo koji vid pomoći po ovom pitanju.

DELEGACIJA OK BIH KOD MINISTRA MAGODE

Predstavnici Olimpijskog komiteta Bosne i Hercegovine, potpredsjednik prof.dr. Izet Rađo i generalni sekretar dr.sci.Said Fazlagić, posjetili su ministra kulture i sporta Kantona Sarajevo Kenana Magodu.



U toku razgovora sa Ministrom razmatrane su teme vezane za aktuelnu situaciju u pogledu vrhunskog sporta te bh. sporta uopšte. Također je prezentovan i plan rada OK BiH u segmentu koji je od obostranog interesa za OK BiH i Kanton, te nadležno Ministarstvo kulture i sporta Kantona Sarajevo.

Ministar je informisan da su u ovoj godini na programu dva višesportska takmičenja u organizaciji OO BiH i to Mediteranske igre Taranto, Italija od 21.08 – 03.09. 2026.g., gdje će bh. mediteranski tim činiti oko 100 takmičara i trenera iz 15 sportova, kao i Svjetske igre mladih (YOG) koje će se održati u Dakar-u, Senegal i to od 31. 10. - 13.11. 2026. godine.

Ministar Magoda izrazio je pohvale na rad i podršku radu Olimpijskom komitetu BiH, naglašavajući značaj dosadašnje i buduće institucionalne saradnje, te realizacije projekata koji doprinose razvoju vrhunskog sporta, kako u Kantonu tako i na državnom nivou.

BH TELECOM I OK BIH: JAČANJE PARTNERSTVA ZA BUDUĆE GENERACIJE



BH Telecom i OK BiH nastavljaju dugogodišnju saradnju koja je postala neizostavan dio olimpijske porodice i Olimpijskog pokreta u BiH. Kompanija BH Telecom i dalje je ponosni partner i sponzor OK BiH, pružajući kontinuiranu podršku svim uspješnim sportskim aktivnostima i izvrsnim sportistima. Generalni direktor BH Telecoma, Amel Kovačević, istakao je važnost zajedničkog djelovanja.

„Dugogodišnja saradnja između Olimpijskog komiteta Bosne i Hercegovine i BH Telecoma je dobro poznata. BH Telecom je, faktički, zaštitni znak različitih sportskih uspjeha bosanskohercegovačkog društva.“

Kovačević je naglasio i ponos kompanije na sportiste.



„Trebalo reći da smo ponosni na sve rezultate koje su bosanskohercegovački sportisti ostvarili pod zastavom Bosne i Hercegovine i s logom BH Telecoma širom svijeta.“ BH Telecom vidi u OK BiH instituciju vrijednu podrške i razvoja zajedničkih projekata. Direktor je dodao da će buduća saradnja biti usmjerena na promociju olimpijskih vrijednosti i prenošenje iskustava vrhunskih sportista na mlađe generacije.

„Ta saradnja treba da se očituje kroz zajedničke aktivnosti u promovisanju vrijednosti Olimpijskog komiteta — vrijednosti koje su neophodne, a često deficitarne u bh. društvu, posebno među mladima.“

Olimpijski komitet BiH zahvalan je BH Telecomu na kontinuiranoj podršci, ocjenjujući kompaniju ključnim partnerom u razvoju sporta i afirmaciji vrijednosti olimpizma u zemlji. Planirane su zajedničke aktivnosti i projekti koji će dodatno osnažiti ulogu sporta u društvu i motivisati mlade talente da slijede uspješne primjere domaćih sportista.

Nastavak saradnje posvećen je dugoročnom razvoju sporta, edukaciji mladih i promociji liderstva kroz sport.

PREDSJEDNIK OK BiH NA KONVENCIJI ATLETSKOG SAVEZA BiH



Atletski savez Bosne i Hercegovine organizovao je konvenciju 28. i 29. marta na kojoj je predsjednik Olimpijskog komiteta BiH, Davor Komšić, održao prezentaciju o radu OK BiH.

Predsjednik Komšić je istakao važnost saradnje između sportskih saveza i Olimpijskog komiteta BiH za dalji razvoj atletike i generalno sporta u BiH.

Trenutno je u realizaciji projekat „Razvoj državnog sportskog sistema“ koji zajednički provode OK BiH i Atletski savez BiH, s ciljem dugoročnog unapređenja trenerske i sudijske strukture ASBiH.

REGIONALNA SURADNJA: OLIMPIJAC TOMOVIĆ RAZMJENJUJE ISKUSTVA S OLIMPIJSKIM ODBOROM BiH



Olimpijac i trenutno najbolji alpski skijaš Republike Srbije Aleksa Tomović boravio je u neslužbenom posjetu Olimpijskom odboru BiH i susreo se s predsjednikom g. Davorom Komšićem.

Posjeta je bila prilika za otvorenu razmjenu mišljenja o stanju skijaškog sporta u regiji, s posebnim osvrtom na iskustva u procesu kvalifikacija i pripremana za ZOI Milano–Cortina 2026.

Velika zahvalnost na gostoprimstvu i zajedničkom radu na unapređenju sporta — zajedno prema novim zimskim uspjesima!

EOK DIGITAL, AI I TECHNOLOGY BIH DOPRINOSI EVROPSKIM STANDARDIMA



Akademik Almir Badnjević, potpredsjednik Komisije za projekte OK Bosne i Hercegovine učestvovao je na sastanku Komisije za Digital, AI i Technology pri međunarodnoj organizaciji Evropski olimpijski komiteti u Madridu.

Tokom dvodnevnog zasjedanja razmatrane su ključne teme vezane za budući razvoj digitalnih i tehnoloških kapaciteta evropskog olimpijskog pokreta. Poseban fokus bio je na upoznavanju sa IT providerom za predstojeće Olimpijske igre, analizi planiranih tehnoloških rješenja, kao i definisanju kalendara aktivnosti i plana rada komisije za naredni period.

Razgovarano je i o savremenim trendovima u oblastima digitalne transformacije sporta, primjene umjetne inteligencije, cyber sigurnosti, upravljanja podacima, interoperabilnosti sistema te unapređenja digitalnog iskustva sportista, nacionalnih olimpijskih komiteta i organizatora velikih sportskih događaja. Učešće predstavnika Bosne i Hercegovine u radu ove komisije potvrđuje da domaći stručnjaci imaju znanje, kredibilitet i kapacitet da ravnopravno učestvuju u procesima koji oblikuju evropske standarde u oblasti sporta i tehnologije.

Prof. dr. Almir Badnjević istakao je da sport i tehnologija danas djeluju kao jedinstven sistem razvoja, te da je važno da Bosna i Hercegovina bude prisutna tamo gdje se donose odluke o budućnosti digitalnog sportskog ekosistema.

Komisija za Digital, AI i Technology djeluje pri EOK-u kao stručno tijelo zaduženo za praćenje tehnoloških trendova, davanje preporuka i podršku nacionalnim olimpijskim komitetima u procesima modernizacije i digitalnog razvoja.

SPORAZUM ZA RAZVOJ SPORTA I EDUKACIJU SPORTISTA



Predsjednik Olimpijskog komiteta BiH prof. dr. sc. Izet Rađo i rektorica Univerziteta "Džemal Bijedić" u Mostaru prof. dr. Alena Huseinbegović potpisali su Memorandum o saradnji kojim su uspostavili okvir za zajednički razvoj sporta.

Memorandumom se potpisnici obavezuju na razvoj i produbljivanje partnerske saradnje radi jačanja međusobnih odnosa u cilju edukacije vrhunskih sportista i razvoja olimpijskih sportova, te na zajedničku podršku organizaciji naučnih i stručnih radionica, susreta istraživača i predavača te uključivanje budućeg Sportsko-edukacijskog centra u kampusu.

Potpisivanju su, pored potpisnika, prisustvovali generalni sekretar OK BiH doc. dr. Said Fazlagić, prorektorica za finansije prof. dr. Armina Hubana, prorektorica za naučno-nastavna pitanja prof. dr. Azra Špago, prorektorica za nauku i naučno-istraživački rad doc. dr. Amela Piralčić i prof. dr. Damir Đedović.

MOSTAR SPORTS SUMMIT 2026

MostarSportsSummitokupiojevrhunske sportistkinje, stručnjake i lidere s jednim jasnim ciljem, razgovarati o putu do vrha, uloziti žena u sportu i stvaranju sistema koji podržava izvrsnost.

Simpozij je svečano otvorio prof. dr. Ekrem Čolakhodžić, dekan Edukacijskog fakulteta, naglašavajući važnost povezivanja akademske zajednice i sporta, te ulogu obrazovanja u razvoju savremenog i održivog sportskog sistema.



Kroz inspirativna izlaganja i otvorene diskusije, obrađene su ključne teme:

- izazovi i prepreke u karijeri sportistkinja
- balans sporta, obrazovanja i privatnog života
- uloga institucija i sistema podrške
- budućnost ženskog sporta u Bosni i Hercegovini

Na Simpoziju, ispred Olimpijskog komiteta Bosne i Hercegovine, prisustvovao je dr. Izet Rađo, koji je istakao ključnu ulogu OK BiH kao integrativnog faktora sportskog sistema, platforme koja povezuje sportiste, saveze i međunarodne partnere.

Više na linku [OVDJE](#).

PROFESOR IZET RAĐO IZABRAN ZA REDOVNOG ČLANA EUROPSKE AKADEMIJE NAUKA I UMJETNOSTI



Veliko priznanje Bosni i Hercegovini - profesor Izet Rađo izabran za redovnog člana Europske akademije nauka i umjetnosti.

Potpredsjednik Olimpijskog komiteta Bosne i Hercegovine i redovni član Internacionalne akademije nauka i umjetnosti u Bosni i Hercegovini, prof. dr. Izet Rađo, izabran je za redovnog člana Europske akademije nauka i umjetnosti. Ovo visoko priznanje predstavlja značajnu ličnu čast, ali i važnu potvrdu da Bosna i Hercegovina posjeduje naučni i intelektualni potencijal ravnopravan europskim akademskim tokovima.

Europska akademija nauka i umjetnosti jedna je od najuglednijih akademskih institucija u Europi, koja okuplja istaknute naučnike, umjetnike i društvene lidere iz različitih oblasti. U njenom članstvu nalazi se i 38 dobitnika Nobelove nagrade, što dodatno potvrđuje njen međunarodni ugled i akademsku relevantnost.

Profesor Rađo je univerzitetski profesor i istaknuti naučnik u oblasti sportskih nauka, menadžmenta u sportu i upravljanja ljudskim resursima. Njegov naučni i društveni rad posebno je usmjeren na povezivanje akademskog znanja, sportskih institucija i olimpijskih vrijednosti, kao i na savremene procese digitalne transformacije i odgovornog liderstva u sportu. Više na linku [OVDJE](#).

PRIZNANJE AKAD. RAĐO IZETU ZA IZUZETAN DOPRINOS RAZVOJU ODSJEKA ZA SPORT



Na Nastavničkom fakultetu Univerziteta „Džemal Bijedić“ u Mostaru prof. dr. Izetu Rađi uručeno je priznanje za izuzetan doprinos razvoju Odsjeka za sport.

Tokom decenija rada, prof. Rađo je zajedno s kolegama predano gradio kadrove, unapređivao nastavni proces i afirmisao naš univerzitet kao važan centar sportskih i društvenih nauka.

Dekan prof. dr. Ekrem Čolakhodžić: „Profesor Rađo je redovni profesor našeg univerziteta. Bio je i ostao lider i vodilja svima nama kojima je bio profesor i mentor. Pored stručnih predmeta, učio nas je životu, a te lekcije se posebno pamte.“

Dodjeli je prisustvovao i prof. dr. Damir Đedović, trener Lane Pudar.

Znanje, liderstvo i vrijednosti koje prenosi generacijama ostaju temelj razvoja sporta i društva.

TRAJNI DOPRINOS OLIMPIJSKOM MUZEJU U LOZANI




Na poziv Međunarodnog olimpijskog komiteta, Elvedina Muzaferija, naša najbolja skijašica, donirala je svoju opremu koja će ostati u Olimpijskom muzeju u Lozani kao trajni simbol hrabrosti i uspjeha.

Potpisana oprema korištena je u Super-G utrci na Zimskim olimpijskim igrama u Cortini d'Ampezzo gdje je osvojila sjajno 16. mjesto - najbolji plasman u historiji zimskog olimpijskog sporta BiH.

Inspiracija za mlade sportiste naše zemlje i širom svijeta.

ZAŠTITITI OBRAZOVANJE KROZ SPORT KAKO BISMO ZAŠTITILI BUDUĆNOST DJECE



OO BiH se pridružio globalnoj kampanji obilježavanja Međunarodnog dana sporta za razvoj i mir, 6. aprila 2026. godine.

Izjava Joëla Bouzoua, predsjednika i osnivača organizacije Peace and Sport:

“ZAŠTITITI OBRAZOVANJE KROZ SPORT KAKO BISMO ZAŠTITILI BUDUĆNOST DJECE”

Na ovaj Međunarodni dan sporta za razvoj i mir podsjećamo se da mir nije apstraktni ideal koji se stvara samo u diplomatskim salonima ili međunarodnim sporazumima. Mir se gradi svakodnevno u školama i na igralištima.

Danas je preko 250 miliona djece širom svijeta van školskog sistema. To nije samo kriza obrazovanja; to je izazov za mir. Kada je otežan pristup obrazovanju i strukturiranim aktivnostima, gubi se ne samo znanje, već i same osnove mirnog suživota... Kada podižemo #WhiteCard na Međunarodni dan sporta za razvoj i mir, ne činimo samo simboličan gest. Mi preuzimamo obvezu.” Kompletnu izjavu pročitajte na [OVOM LINKU](#).

SPORTSKI SAVEZI BOSNE I HERCEGOVINE

POSJETE SAVEZIMA I JAČANJE SPORTA U BOSNI I HERCEGOVINI



Predsjednik Olimpijskog odbora Bosne i Hercegovine, gospodin Davor Komšić, u proteklom periodu posjetio je brojne sportske saveze Bosne i Hercegovine. Cilj posjeta bio je upoznavanje s osobljem i radom sportskih saveza BiH kako bi zajednički jačali sport u BiH!

POSJETE SAVEZIMA I JAČANJE SPORTA U BOSNI I HERCEGOVINI



U prostorijama OO BiH u službenoj posjeti boravili predstavnici Rukometnog saveza BiH Dario Pušić, predsjednik i Branislav Stojkić, dopredsjednik Skupštine Saveza. Na sastanku su iznijeli stanje u Savezu, istaknuli ključne probleme, naročito financijske, te predložili mjere za unapređenje rukometa u BiH. Naglašeni su hitni izazovi: baraž za Svjetsko prvenstvo (Farski otoci), nastup juniorske reprezentacije na EP, polufinale RK Izviđač u Kupu EHF, te organizacija međunarodnih turnira.

Predsjednik OK BiH Davor Komšić pohvalio je rad saveza, ponudio konkretne prijedloge za neposrednu suradnju i istaknuo Rukometni savez kao primjer transparentnog i kvalitetnog funkcioniranja. Pročitajte više na [OVOM LINKU](#).

RAGBI SAVEZ BIH | TEAM GRANT SUPPORT - PRVI KAMP ŽENSKE SENIORSKE RAGBI SELEKCIJE BIH

U suradnji s Olimpijskim komitetom Bosne i Hercegovine, u okviru programa Team Support Grant, na stadionu Kamberovića polja, u organizaciji Ragbi saveza Bosne i Hercegovine, održan je Prvi kamp za potencijalne kandidatkinje ženske seniorske ragbi selekcije BiH u ragbiju 7.

Tijekom dva intenzivna dana djevojke su radile na ragbi vještinama, unapređivale taktička znanja i odigrale nekoliko zanimljivih trening-utakmica u nedjelju, 22.03.2026. Kampu je ukupno prisustvovalo 20 djevojkica i 5 trenera iz Bosne i Hercegovine i inozemstva.



RAGBI SAVEZ BIH | CROSS BORDER KAMP ŽENSKE RAGBI SELEKCIJE

U okviru suradnje Ragbi saveza BiH i Hrvatske, uz podršku World Rugby i Team Support Grant OK BiH, održan je prekogranični kamp ženske selekcije. Učesnice su prošle četiri strukturirana treninga (dodavanja, obaranje i ruck, scrum, lineout), sudjelovale na radionici sportske psihologije usmjerenoj na samopouzdanje, komunikaciju i upravljanje pritiskom, te pohađale edukaciju o prevenciji povreda prema Activate programu. Kamp je kombinirao tehnički razvoj, timsku koheziju i sigurnost igrača, a sljedeći termin je 15.-17.06.2026. u Zenici.



RAGBI SAVEZ BIH | EDUKACIJA | NICK SCOTT U ZENICI

U period od 24 - 26.04.2026. godine u Ragbi savezu Bosne i Hercegovine boravio je gdn Nick Scott predstavnik World Rugby (Svjetske ragbi asocijacije) koji je proveo edukaciju mladih trenera kandidata za trenersku licencu. Gdn Nick Scott je dugogodišnji sportski radnik jedne od najuspješnijih generacija ragbijaša Engleske i član trenerskog tima ragbi ekipe Engleske koja je osvojila Svjetsko prvenstvo. Duži niz godina radi kao edukator World Rugby, naročito sa mladim trenerima.



Ovo je izuzetno važna edukacija za buduće trenere u Ragbi savezu Bosne i Hercegovine koji doprinose razvoju ragbija u BiH. Gdn Scott nosi pozitivne emocije iz Zenice, a sljedeću edukaciju zakazao je za septembar 2026. godine u Zenici.

BICIKLISTIČKI SAVEZ BIH | ZAVRŠEN TOUR OF BOSNIA AND HERZEGOVINA 2026 UZ SPECIJALNU PODRŠKU OK BIH



Završena je prva biciklistička utrka Tour of Bosnia and Herzegovina, važan iskorak za razvoj biciklizma i sporta u Bosni i Hercegovini, uz prisustvo i podršku Olimpijskog odbora kao posebnog partnera.

Ovaj ambiciozni projekt pokazao je da zemlja može organizirati natjecanje međunarodnog ranga koje povezuje sportski rezultat, turističku promociju i pozitivne gospodarske učinke za lokalne zajednice. Sudjelovanje i strateška potpora Olimpijskog odbora BiH podigli su organizacijske standarde, osigurali vidljivost na međunarodnoj razini te stvorili bolju platformu za razvoj mladih talenata i za buduća natjecanja.

Predsjednik Olimpijskog odbora Davor Komšić čestitao je organizatorima na iznimnom uspjehu.

„U ime OK BiH moram reći da sam iznimno zadovoljan projektom ‘Tour of Bosnia and Herzegovina 2026’, kojem je OK BiH od same ideje cijelo vrijeme davao nesebičnu potporu. OK BiH će nastaviti pružati sve vrste potpore ovakvim i sličnim projektima koji imaju fokus na poveznici ‘vrhunski sport, samoodrživost, širi gospodarski efekti sporta’”. Više na linku [OVDJE](#).



TRIATLON I PENTATLON SAVEZ BIH | JAJCE TRIATHLON CHALLENGE 2026: NOVA STRANICA RAZVOJA TRIATLONA U BOSNI I HERCEGOVINI



Bosna i Hercegovina ove godine pravi važan iskorak u razvoju multisportova organizacijom Jajce Triathlon Challenge 2026, međunarodne sportske manifestacije koja će se održati 30. i 31. maja u Jajcu.

Ovaj događaj predstavlja prvu triatlonsku utrku na poludistanci u našoj zemlji, a dodatni značaj daje činjenica da će se u okviru utrke održati i Državno prvenstvo Bosne i Hercegovine u triatlonskoj poludistanci. Time Jajce Triathlon Challenge postaje važna prekretnica u razvoju triatlona i stvaranju novih prilika za domaće sportiste.

U regionalnom kontekstu, riječ je o izuzetno rijetkom događaju, u ovom dijelu Evrope postoji svega pet utrka na poludistanci, što dodatno naglašava važnost ovog projekta za Bosnu i Hercegovinu.

Veliki interes za učešće potvrđuje i međunarodni karakter utrke. Do sada je prijavljeno više od 120 takmičara iz 11 država, koji dolaze iz preko 30 triatlon klubova, čime se dodatno doprinosi povezivanju sportista i promociji Bosne i Hercegovine na međunarodnoj sceni.

Organizator događaja je Triatlon klub 5ELEMENT2031, u saradnji sa Triatlon i pentatlon savezom Bosne i Hercegovine i uz podršku Općine Jajce. Utrka se organizuje u skladu sa pravilima World Triathlon, čime se osigurava visok nivo sigurnosti i profesionalnih standarda.

Posebna vrijednost Jajce Triathlon Challengea ogleda se i u njegovoj inkluzivnosti. Program događaja uključuje i dječiju duatlon trku, koja najmlađim učesnicima pruža priliku da naprave svoje prve korake u sportu, u sigurnom i podržavajućem okruženju.

Osim sportskog aspekta, događaj ima značajan utjecaj na razvoj aktivnog turizma, jer okuplja sportiste i njihove porodice iz različitih zemalja, promovirajući prirodne ljepote i kulturno naslijeđe Bosne i Hercegovine.

Jajce Triathlon Challenge nije samo takmičenje to je platforma za promociju zdravog načina života, povezivanje sportista i jačanje pozicije Bosne i Hercegovine na međunarodnoj sportskoj mapi.

TAEKWONDO SAVEZ BIH | DRŽAVNO PRVENSTVO U OLIMPIJSKOM TAEKWONDOLU

U sjajnoj sportskoj atmosferi svečano je otvoreno Državno prvenstvo u olimpijskom taekwondou, koje je okupilo više od 600 takmičara iz 42 kluba širom Bosne i Hercegovine. Ceremoniju otvaranja svojim prisustvom uveličali su brojni zvaničnici i istaknuti predstavnici sportskog i javnog života.

Prisutnima se obratio Samir Šarić predsjednik odbora za olimpijski taekwondo i član predsjedništva. Takođe se obratio Loannis Mouroutsos sportski direktor European Taekwondo Union (ETU). Prvenstvo je zvanično otvorila Jelena Pekić, zamjenica predsjedavajućeg Skupštine Kantona Sarajevo.

Ceremoniji su prisustvovali i zamjenica predsjedavajućeg Skupštine Kantona Sarajevo Danijela Kristić, član predsjedništva TKDS BiH August Orlović, potpredsjednik TKDS FBiH Branko Stanić, brigadir Oružanih snaga BiH Kemal Suljević, kao i selektor reprezentacije BiH u olimpijskom taekwondou Haris Husić. Posebnu čast predstavlja prisustvo gospodina Loannis Mouroutsos, kojem je ovom prilikom svečano uručena službena trenerka reprezentacije Bosne i Hercegovine sa njegovim imenom, kao znak zahvalnosti i poštovanja.



SAVEZ TAJLANDSKOG BOKSA BIH | DRŽAVNO PRVENSTVO

Savez tajlandskog boksa BiH s velikim ponosom najavljuje Državno prvenstvo BiH u Muay Thai sportu, koje će se održati u nedjelju, 24. svibnja 2026. godine, u Gradskoj športskoj dvorani u Ljubuškom.

“Domaćin ovog prestižnog sportskog događaja je Klub tajlandskog boksa “Ludvig Pavlović” iz Ljubuškog – prvi osnovani Muay Thai klub u Bosni i Hercegovini, koji iza sebe ima impresivno iskustvo s više od 100 uspješno organiziranih sportskih događaja. Njihova predanost razvoju ovog sporta učinila ih je jednim od ključnih nositelja Muay Thai scene u zemlji. Na Prvenstvu će sudjelovati natjecatelji svih dobnih i težinskih kategorija iz cijele Bosne i Hercegovine. Očekuje nas vrhunski sportski spektakl, prepun borbenog duha, discipline i atraktivnih mečeva koji će zasigurno oduševiti sve ljubitelje borilačkih sportova. Ovo natjecanje ima poseban značaj jer predstavlja i izborno prvenstvo za formiranje reprezentacije Bosne i Hercegovine. Najbolji borci izborit će svoje mjesto u nacionalnom timu za nastupe na velikim međunarodnim natjecanjima – Europskom prvenstvu u Parizu (Francuska) te Svjetskom prvenstvu u Prištini (Kosovo) za 2026 godinu. Pred organizatorima i državnim savezom nalazi se veliki izazov, ali i prilika da još jednom pokažu snagu, organiziranost i potencijal Muay Thai sporta u Bosni i Hercegovini. Ovaj sport sve snažnije zauzima svoje mjesto na sportskoj sceni, osvajajući publiku svojom dinamikom, tehnikom i posebnom estetikom borbe. Ovaj put će suci morati dati sve od sebe da maksimalno cijene tehnike muay thai sporta, kako one napadačke, tako i one obrambene. Borci u ringu se moraju poštovati i respektirati i neka zaista pobjede najbolji”, izjavili su iz Saveza.



KICKBOXING SAVEZ BIH | ODRŽAN 1. DIO DRŽAVNOG PRVENSTVA



Od 18. do 19. aprila 2026. u Sportskoj dvorani "Emir Karadž-Eki" u Bugojnu održan je 1. dio Državnog prvenstva u disciplinama Low Kick, Kick Light i Point Fighting.

Na ovom takmičenju nastupio je 371 takmičar iz 60 klubova. Ovo, a i svako drugo prvenstvo, je put ka reprezentativnoj selekciji. Tehnički organizator prvenstva je bio Kick boks klub "IZAZOV", domaćin Ramiz Škembčić, Safet Babić i Mersudin Hadžić.

CHEERLEADING SAVEZ BIH | DRŽAVNO PRVENSTVO



28.03.2026. godine održano je Cheerleading prvenstvo Bosne i Hercegovine u Čapljini. Sudjelovalo je preko 400 sportašica i sportaša iz 8 gradova Bosne i Hercegovine i to Čapljina, Ledinac, Gacko, Nevesinje, Ljubinje, Ljubuški, Mostar i Široki Brijeg. Prvenstvo se održalo u gradskoj dvorani, a domaćin prvenstva je Plesni i cheerleading klub Erigo D Čapljina. Prvenstvo je otvorila predstavica Grada Čapljine Marija Proleta, koja je sudionicima uputila riječi

podrške. Prvenstvu je prisustvovao i član izvršnog odbora Olimpijskog odbora Bosne i Hercegovine gospodin Ivan Brkić koji je najboljima dodijelio medalje. Prvenstvo su sudili međunarodni suci iz Hrvatske i Rumunjske.

CHEERLEADING SAVEZ BIH | SVJETSKO PRVENSTVO



U Orlandu od 22. do 24.04. održano je Svjetsko cheerleading prvenstvo na kojem je sudjelovalo preko 4.500 sportašica i sportaša.

Bosna i Hercegovina zbog nedostatka financija nije nastupila, ali je bila zastupljena predsjednicom Cheerleading saveza Nikolinom Čolak. Ona je sudjelovala na Generalnoj skupštini i popratnim sastancima, te je po prvi put imala čast dodjeljivati medalje na prvenstvu — prijenos je bio uživo na Olimpijskoj televiziji i službenoj stranici

Saveza, što predstavlja značajnu promociju za Bosnu i Hercegovinu.

BH • TEAM

BOSNA I HERCEGOVINA NA SVJETSKOM PRVENSTVU



Dragi Zmajevi ,

Iskrene čestitke Nogometnoj/
Fudbalskoj reprezentaciji
Bosne i Hercegovine na
veličanstvenoj pobjedi nad
selekcijom Italije i plasmanu na
Svjetsko prvenstvo!

Pokazali ste karakter, odlučnost
i ljubav prema dresu koje cijela
država ponosno nosi.


Sljedeća stanica:
Svjetsko prvenstvo!

Sretno reprezentaciji, selektoru i Nogometnom/Fudbalskom savezu BiH, vjerujemo i stojimo uz vas!

Vaš Olimpijski komitet Bosne i Hercegovine

FOTO:NFSBiH

HISTORIJSKI USPJEH ZA BH DIZANJE TEGOVA



Naš olimpijac Andranik Karapetyan osvojio je srebrnu medalju u trzaju na Europskom seniorskom prvenstvu 2026. u Batumiju, Gruzija — prva ikad evropska medalja za Bosnu i Hercegovinu u dizanju tegova!

Nakon toga osvojio je i bronzu u totalu. Dvije medalje za BiH!

Čestitke Andraniku i cijelom timu!

TEA KOVAČEVIĆ - ISTORIJSKI ISKORAK ZA BIH



Tea Kovačević prva je finalistica profesionalnog turnira iz Bosne i Hercegovine u historiji (i u muškoj i u ženskoj konkurenciji) sa samo 15 godina.

Izuzetan rezultat: plasman u seniorsko finale sa 15 godina potvrđuje izvanredan potencijal i brz napredak.

Pobjeda protiv favoritkinje: savladala je prvu nositeljku turnira, Zhibek Kulambayevu (WTA #422).

Uspjeh na zemljanoj podlozi dodatno potvrđuje tehničku prilagodljivost.

Veliki potencijal za skoriji ulazak na WTA listu: Tea trenutno nema WTA ranking, pa je plasman u finale snažan signal da će uskoro zarađivati bodove i poziciju.

Podstrek za bh. tenis: promocija i razvoj tenisa u zemlji i regionu. Olimpijski komitet Bosne i Hercegovine prepoznaje uspjehe naših sportista, te upućuje iskrene čestitke.

NOVI USPJEH ZA BH. JUDO: KORINA DŽIDIĆ BRONZANA NA EVROPSKOM SENIORSKOM KUPU U DUBROVNIKU

Reprezentativke Bosne i Hercegovine, Korina Džidić i Johanna Elisabeth Klinger (Judo klub Bursa Mostar), ostvarile su zapažen nastup na Evropskom seniorskom kupu u Dubrovniku, jednom od kvalitetnijih takmičenja na evropskom judo kalendaru.

U konkurenciji 32 reprezentacije i ukupno 305 takmičara, bh. reprezentacija imala je zapažen nastup, a posebno su se istakle Džidić i Klinger u kategoriji do 78 kilograma, gdje su se uspješno plasirale u završnicu. Na putu do borbe za medalju ostvarile su po dvije pobjede, potvrdivši kvalitet i kontinuitet dobrih rezultata koje Bosna i Hercegovina bilježi na međunarodnoj sceni.



Posebnost ovog takmičenja bila je činjenica da su se dvije bh. reprezentativke susrele upravo u borbi za bronzanu medalju, čime je Bosna i Hercegovina osigurala još jedan vrijedan međunarodni uspjeh. U izjednačenom i taktički zahtjevnom meču slavila je Korina Džidić, koja je osvojila bronzanu medalju i nove bodove na seniorskoj EJU rang-listi, dok je Johanna Elisabeth Klinger takmičenje završila na petom mjestu. Važno je istaći da su obje bh. reprezentativke još uvijek juniorke, ali već ostvaruju značajne rezultate i ravnopravno konkuriraju na seniorskoj međunarodnoj sceni, što predstavlja veliki potencijal i svijetlu budućnost za judo u Bosni i Hercegovini.

Na ovom takmičenju reprezentaciju Bosne i Hercegovine predstavljalo je ukupno osam takmičara iz klubova: Bursa Mostar, Bosna Sarajevo, Romanija Pale i Famos Istočno Sarajevo.

VELIKI USPJEH BH. SKIJANJA: ANUR MEHIĆ U SAMOM VRHU SVJETSKOG SKIJANJA U SVOJOJ GENERACIJI



Prema FIS listi od 7. aprila, mladi bh. skijaš Anur Mehić (2009) trenutno je najbolje rangirani slalomaš svijeta svoje generacije sa 37.33 FIS boda u disciplini slalom. Sezonu prema važećem sistemu bodovanja završava sa 32.71 boda, što potvrđuje njegov konstantan napredak na međunarodnoj sceni.

Anur je ove sezone ostvario niz značajnih rezultata: pobjede u slalomu u St. Moritzu (Švicarska), Sextenu i San Vito di Cadore (Italija) u konkurenciji do 21 godine, nakon čega je uspješno prešao na seniorske FIS utrke. Taj prelazak bio je strateška odluka usmjerena

na ubrzani razvoj kroz natjecanje s iskusnijim protivnicima, a donio je i dodatno iskustvo te potvrdu konkurentnosti u međunarodnoj eliti.

Prema najavama FIS-a, od narednih sezona mijenja se sustav bodovanja (prosjeak triju najboljih rezultata i uvođenje "category adder" od 8 bodova), što će utjecati na rangiranje, ali trenutni plasman Anura ostaje iznimno vrijedna referenca. Trenutno je na 362. mjestu ukupne svjetske ljestvice u slalomu, a ambicije tima uključuju plasman među 200 najboljih, nastup na EYOF-u 2027. te ulazak u Svjetski skijaški kup u naredne četiri godine.

Iz Anurovog tima ističu da je rezultat plod dugogodišnjeg rada, jasnog programa razvoja i predanosti sportaša, te najavljuju nastavak priprema i nastupa s ciljem daljnjeg napredovanja.

ANUR MEHIĆ U POSJETI OK BIH



Prostorije OK BiH posjetio je Anur Mehić, jedan od najperspektivnijih mladih skijaša Bosne i Hercegovine.

Tokom razgovora osvrnuo se na proteklu sezonu, ističući da je prezadovoljan ostvarenim rezultatima, koji su premašili očekivanja.

Nakon kratkog odmora, već počinju pripreme za naredne Olimpijske igre u francuskim Alpama.

Trenutni fokus je naredna sezona, EYOF 2027 Brašov (Rumunija) i U18 Svjetsko prvenstvo, gdje se očekuju izuzetno visoki plasmani.

Predsjednik OK BiH Davor Komšić obećao je punu podršku kroz programe MOK-a i EOK-a, kao i kroz odluke Izvršnog odbora o finansijskoj podršci i Programu Plus za ovakve sportiste.

DVIJE MEDALJE ZA BIH U RIMU: ZLATO NEJRE, BRONZA EMINE!

Tim BiH na Karate1 Premier League u Rimu, jednom od najprestižnijih turnira pod okriljem WKF.

- Nejra Sipović — zlato, seniorke do 55 kg
- Emina Sipović — bronza, seniorke do 61 kg
- Anes Bostandžić — 5. mjesto, seniorsi +84 kg



Na ovom takmičenju nastupa 32 najbolje rangirana takmičara svijeta u svakoj kategoriji. Čestitamo Nejri, Emimi, Anesu, cijelom timu i savezu na izvanrednim rezultatima i promociji bosanskohercegovačkog sporta!

DVIJE MEDALJE NA KARATE 1 PREMIER LEAGUE – LESHAN, KINA



Reprezentativci Bosne i Hercegovine ostvarili vrhunske rezultate na jednom od najjačih svjetskih karate takmičenja.

Na turniru gdje su učestvovala samo 32 najbolja seniora svijeta, Anes Bostandžić osvojio je srebro, a Nejra Sipović bronzu.

Rad, strpljenje, padovi i ponovno dizanje, svaka medalja je stepenica više i dokaz da sam na pravom putu. Odlična provjera pred Europsko prvenstvo, kazao je Anes.

Nakon zlata u Rimu, bronzana medalja u kategoriji seniorki do 55 kg. Borbeno, sigurno i bez odustajanja.

Potvrda u borbi za Grand Winner titulu ove sezone.

Čestitamo Anesu i Nejri što dostojno brane boje Bosne i Hercegovine!

REPREZENTACIJA BIH IZBORILA NASTUP NA KVALIFIKACIONOM TURNIRU JUGOISTOČNE EVROPE U OSIJEKU



Reprezentacija Bosne i Hercegovine uspješno je nastupila na Evropskom prvenstvu u Burgasu, gdje je ostvarila rezultate koji su joj donijeli plasman na kvalifikacioni turnir regije Jugoistočne Evrope u Osijeku, i to u obje kategorije – vazдушna puška i vazdušni pištolj. Na kvalifikacionom turniru u Osijeku bh. reprezentacija nastavila je sa vrlo dobrim nastupima. Prvog dana takmičenja ekipa Bosne i Hercegovine u disciplini vazдушna puška ostvarila je vrijedne pobjede protiv selekcija Crne Gore i Hrvatske. Tim Bosne i Hercegovine nastupio je u sastavu Zakira Pušina, Memišević Amir, Mulahmetović Merima i Fazlija Benjamin, a ovi trijumfi već tada su praktično osigurali plasman na veliko finale koje će se održati u Letoniji. Drugog dana kvalifikacionog turnira reprezentacija BiH zabilježila je pobjedu protiv selekcije Ukrajine, dok je duel sa reprezentacijom Srbije završen neriješenim rezultatom, nakon čega je u odlučujućem meču slavila selekcija Srbije. Kao posebno vrijedan rezultat izdvaja se upravo pobjeda nad reprezentacijom Ukrajine, imajući u vidu njihovu dugogodišnju stručnost, kontinuitet vrhunskih rezultata, kao i znatno bolje uslove za rad i tehničku opremljenost. Iako je plasman na finale u Letoniji bio zagarantovan još nakon prvog dana takmičenja, ostvareni rezultati drugog dana dodatno su unaprijedili ukupnu poziciju reprezentacije Bosne i Hercegovine u konačnom poretku turnira. Ovim nastupima bh. reprezentacija potvrdila je kontinuitet dobrih rezultata i konkurentnost na međunarodnoj sceni, te s optimizmom dočekuje završni turnir u Letoniji.

ALPE ADRIA TROPHY – FINAL



Reprezentativci Bosne i Hercegovine u brzom klizanju (short track), Nedim Muzaferović i Ermin Raščić, uz podršku Saveza klizačkih sportova BiH i BH Telecoma, nastupili su na međunarodnom takmičenju Alpe Adria Trophy – Final, koje je održano od 27. do 29. marta mjeseca u Celju (Slovenija).

Na ovom jakom takmičenju učestvovalo je 128 brzoklizača iz osam zemalja. Naši reprezentativci ostvarili su odlične rezultate. Nedim Muzaferović, u kategoriji juniora A, osvojio je drugo mjesto i srebrnu medalju, dok je Ermin Raščić, u seniorskoj konkurenciji, zauzeo treće mjesto i osvojio bronzanu medalju.

Za naše reprezentativce ovo je bio posljednji nastup u klizačkoj sezoni 2025/26, koji je okončan uspješno. Nakon naporene sezone i kraćeg odmora, nastavak priprema za nastupe u sezoni 2026/27 planiran je krajem juna ove godine.

TARIK OMERAGIĆ NASTUPIO NA SVJETSKOM PRVENSTVU



Najbolji bosanskohercegovački brzoklizač Tarik Omeragić nastupio je na Svjetskom seniorskom prvenstvu u brzom klizanju – short track, koje je održano od 13. do 15. marta u Montrealu (Kanada).


Na ovom Svjetskom prvenstvu nastupilo je 57 najboljih brzoklizača svijeta, a Tarik je zabilježio dobar nastup u svim disciplinama. Najbolji rezultat ostvario je u trci na 1000 metara, gdje je zauzeo 35. mjesto.

Ovo je za našeg reprezentativca bio posljednji nastup u ovoj uspješnoj klizačkoj sezoni, a Savez klizačkih sportova BiH zadovoljan je njegovim

nastupima i rezultatima, posebno načinom na koji je ponosno i dostojanstveno predstavljao Bosnu i Hercegovinu na međunarodnoj sceni.

Nakon kraćeg odmora u Sarajevu, Tarik će započeti pripreme za novu klizačku sezonu, u kojoj ga ponovo očekuju najjača takmičenja u Evropi i svijetu, uključujući Evropsko prvenstvo, Svjetsko prvenstvo i takmičenja Svjetskog kupa.

OKI FANTOMI - PRVACI EVROPE 2026



Fantomi u finalu savladali KSO Spid 3:2 i po peti put uzastopno postali prvaci Evrope!

Fantomi su do finala došli bez poraza i izgubljenog seta.

“Ovo je bila jako teška i napeta utakmica...” - Mirzet Duran, kapiten i MVP turnira.

“Još uvijek sam pod emocijama. Lijepo je biti opet prvak Evrope”, izjavio je Sead Mršo, trener.

Olimpijski komitet Bosne i Hercegovine čestita kompletном timu na ovoj sjajnoj pobjedi i rezultatu.

EU PROJEKTI

PREDSTAVLJANJE AKTUELNIH EU PROJEKATA OK BIH



Na 3. Generalnoj skupštini Olimpijskog komiteta Bosne i Hercegovine, članovima i gostima predstavljeni su aktuelni i novi EU projekti kroz koje OK BiH jača kapacitete, inkluzivnost i dobre prakse u sportu.

U 2025. godini OK BiH započeo je realizaciju dva značajna Erasmus+ projekta. SafeHarbour usmjeren je na jačanje mehanizama zaštite sportista; u okviru projekta Komitet je dobio certificiranog IOC Safeguarding officera, čime

je dodatno ojačana briga za sigurnost i dobrobit sportaša. Drugi projekt, Aktivni zajedno — Evropska sedmica sporta, realizovan je kroz više lokalnih aktivnosti, među kojima su 5k utrka Atletist u Istočnom Sarajevu i inkluzivni dan „Sport za sve“ u Tuzli u saradnji sa Specijalnom olimpijadom BiH.

OK BiH je također partner u IPA projektu Evropska sedmica sporta, inicijativi Evropske komisije pod sloganom #BeActive, čiji je koordinator Ministarstvo civilnih poslova BiH. Ovogodišnja #BeActive kampanja proputovala je kroz devet gradova Bosne i Hercegovine i okupila hiljade učesnika svih uzrasta u raznovrsnim sportskim aktivnostima: fudbal (Cazin), ragbi (Zenica), vaterpolo (Neum), triatlon (Tuzla), karling (Pale), cheerleading (Široki Brijeg), konjički sport (Sarajevo), kajaking (Banja Luka) te centralni događaj u Visokom. Kampanja je potvrdila poruku da su sport i fizička aktivnost ključ zdravlja, zajedništva i kvaliteta života.

Početakom 2026. godine OK BiH započinje svoje dvogodišnje putovanje u četiri nova Erasmus+ projekta koji će dodatno unaprijediti sportski sistem u BiH

- **STRONG** — razvoj okvira za unapređenje dobrog upravljanja u evropskim nacionalnim olimpijskim komitetima, s fokusom na zaštitu prava i odgovornosti sportista;
- **VALUE COMPASS** — jačanje demokratskih vrijednosti u i kroz sport u Evropi;
- **WELEAD** — unapređenje uloge žena u društvu, posebno nezaposlenih i neaktivnih, kroz razvoj i evaluaciju znanja i vještina sportskog liderstva;
- **WAVE** — promocija rodne ravnopravnosti i liderskih mogućnosti za žene u sportovima na otvorenom širom Zapadnog Balkana.

Kroz ove projekte Olimpijski komitet Bosne i Hercegovine kontinuirano radi na unapređenju sportskog sistema u Bosni i Hercegovini — od zaštite sportista i inkluzije do promocije liderstva i demokratskih vrijednosti u sportu.



INTERVJU VEDAD KARIĆ

OK BiH: Prvo izdanje međunarodne biciklističke utrke Tour of Bosnia and Herzegovina je iza nas. Vi ste bili jedan od članova tima Bosne i Hercegovine, kako je ova utrka ostavila utisak na vas, imajući u vidu da se radi o domaćem terenu?

VEDAD KARIĆ: Prvo izdanje međunarodne biciklističke utrke Tour of Bosnia and Herzegovina ostavilo je zaista poseban utisak, ne samo na mene već i na sve učesnike cjelokupne organizacije. Biti dio utrke na domaćem terenu ima posebnu emociju, jer predstavljaš svoju državu pred domaćom publikom, porodicom i prijateljima. Smatram da je ovo veliki korak za biciklizam u Bosni i Hercegovini i nadam se da će utrka iz godine u godinu rasti i postati prepoznatljiva i van regiona.

OK BiH: Vozile su se tri etape koje su povezale različite regije Bosne i Hercegovine. Koji dio Toura je bio najteži i možda najzahtjevniji?

VK: Svaka etapa nosi svoju težinu i svaka je na svoj način zahtjevna. Etape su same po sebi bile izuzetno brze, što nivo adrenalina diže na zaista visok nivo kada pored fizičke spremnosti morate biti i mentalno pripravniji, jer svaka sitna greška može biti kobna, kako po vas, tako i ostale učesnike pelotona. Takve etape traže maksimalnu fizičku i mentalnu spremu.

OK BiH: Od kada ste u svijetu biciklizma?

VK: U svijetu biciklizma sam već preko 20 godina. Ljubav prema biciklizmu se razvila još od ranog djetinjstva, tako da sam kroz sve uzrasne kategorije nosio dres reprezentacije. Naravno, seniorski period je nekako najzanimljiviji kada su uključene i timske taktike, analize protivnika, profila staza i svih ostalih "sitnica" koje mogu napraviti prevagu u samom rezultatu.

OK BiH: Kojom disciplinom se trenutno bavite?

VK: Trenutno se najviše bavim drumskim biciklizmom, međutim, kroz svoju karijeru sam nastupao u svim disciplinama i u istim bio prvak države, tako da smatram da bi svaki biciklista kroz razvoj trebao proći više disciplina koje će mu pomoći da stekne iskustvo i kompletnost kao bicikliste, a ujedno da zna bolje rezonovati situaciju u kojoj se nađe prilikom utrke.



OK BiH: *Koliko je težak put za mladu osobu ili za bilo koga ko želi profesionalno da se bavi biciklizmom, u Bosni i Hercegovini?*

VK: Put do profesionalnog biciklizma u Bosni i Hercegovini nije lagan. Potrebno je mnogo rada, discipline i odricanja, ali često nedostaju uslovi, infrastruktura i ono najvažnije, finansijska podrška. Uprkos tome, mislim da se uz veliku želju, podršku porodice i kluba može napraviti ozbiljan rezultat. Najbitnije u svemu tome je da taj budući profesionalac odmah na startu svoje karijere poreda prioritete u životu.

OK BiH: *Učestvujući na raznim regionalnim i svjetskim takmičenjima, vjerovatno ste imali priliku razgovarati sa mnogim kolegama. Iz vašeg iskustva, gdje se najviše ulaže u ovaj sport, a gdje najmanje i gdje mislite da je Bosna i Hercegovina u toj priči?*

VK: Kroz razgovore sa biciklistima izvan države i iskustva sa raznih međunarodnih takmičenja, vidljivo je da se u državama zapadne Evrope mnogo više ulaže u biciklizam – od infrastrukture i razvoja mladih kategorija do profesionalnih timova i organizacije utrka. Kod nas postoji potencijal i talent, ali su ulaganja još uvijek znatno manja nego što bi trebala biti. Ipak, vjerujem da se situacija polako mijenja na bolje.

OK BiH: *Koliko je odricanja potrebno u ovom sportu?*

VK: Biciklizam je sport koji traži ogromna odricanja. Treninzi su svakodnevni i višesatni, bez obzira na vremenske uslove. Potrebno je prilagoditi ishranu, odmor, društveni život i mnoge druge stvari kako bi se ostvario napredak i ostali konkurentni.

OK BiH: *Iz perspektive sportiste koji se bavi biciklizmom šta poručujete mladima, ne samo sportistima, ali posebno onima koji žele ići vašim putem?*

VK: Mladima bih poručio da vjeruju u sebe i budu uporni, bez obzira koliko put nekada izgledao težak. Sport, a posebno biciklizam, uči vas disciplini, strpljenju i radu na sebi. Rezultati ne dolaze preko noći, ali uz trud, posvećenost i ljubav prema onome što radite, sve je moguće. Najvažnije je ostati dosljedan svojim ciljevima i nikada ne odustajati.



ZAVIRITE U DRUŠTVENE MREŽE OK BIH (klikom na sliku)




Predsjednik Olimpijskog komiteta Bosne i Hercegovine, gospodin Davor Komšić, proteklih sedam dana posjetio je četiri bosanskohercegovačka sportska saveza.

Cilj posjeta bio je upoznavanje s osobljem i radom s Atletskim savezom Bosne i Hercegovine, Esport savezom BiH, Biatlon savezom Bosne i Hercegovine i Karling savezom BiH.

Zajedno jačamo sport u BiH! 🇧🇦

#okbih #savezi #sport



Pratite nas na društvenim mrežama:
(klikom na ikone)



©2026. Olimpijski komitet Bosne i Hercegovine.
Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



Moja priča.

